

MINISTERIO DE DEFENSA

6034 *REAL DECRETO 382/2008, do 14 de marzo, polo que se modifica o Regulamento xeral de ingreso e promoción nas Forzas Armadas, aprobado polo Real decreto 1735/2000, do 20 de outubro. («BOE» 82, do 4-4-2008.)*

A Lei 8/2006, do 24 de abril, de tropa e mariñeiría, modificou o sistema de acceso aos centros docentes militares de formación para a incorporación ás escalas de suboficiais, posibilitando, segundo se dispón no artigo 15, que unha porcentaxe das prazas que se convoquen para o ingreso se poidan ofertar por acceso directo.

O Regulamento xeral de ingreso e promoción nas Forzas Armadas, aprobado polo Real decreto 1735/2000, do 20 de outubro, desenvolveuse no marco da Lei 17/1999, do 18 de maio, de réxime do persoal das Forzas Armadas que, no ámbito do ensino, tiña como un dos obxectivos a permeabilidade entre as escalas, o que se conseguía potenciando a promoción interna e o cambio de corpo dentro do mesmo exército. Neste sentido, aos militares profesionais de tropa e mariñeiría reserváballes a totalidade das prazas que se convocaban para acceder aos centros docentes militares de formación para a incorporación ás escalas de suboficiais.

A Lei 39/2007, do 19 de novembro, da carreira militar, mantén o principio de impulsar e facilitar os procesos de promoción que permitan o cambio de escala, referíndose á Lei 8/2006, do 24 de abril, no que respecta á reserva de prazas que se lles aplicará aos militares de tropa e mariñeiría para ascender ás escalas de suboficiais.

Faise daquela necesario cumprir cos preceptos da lei para o acceso directo, establecendo as bases que permitan desenvolver con todas as garantías os principios constitucionais de igualdade, mérito e capacidade, detallando os requisitos específicos para o ingreso nos centros docentes militares de formación para a incorporación ás escalas de suboficiais.

Por outra parte, co fin de aproveitar ao máximo os recursos humanos con posibilidades de ingresar nas Forzas Armadas, trasládase ás convocatorias o determinar en que momento se deben acreditar os niveis de estudos ou de titulación exixidos.

Finalmente, co obxecto de posibilitar o acceso de estranxeiros á condición de militar de complemento no Corpo Militar de Sanidade, na especialidade de medicina, introdúcese unha disposición adicional dirixida a regular o previsto na disposición adicional sexta da Lei 39/2007, do 19 de novembro, da carreira militar, establecendo os países cuxos nacionais podrán adquirir a condición de militares de complemento.

Na súa virtude, por proposta do ministro de Defensa, coa aprobación previa da ministra de Administracións Públicas, de acordo co Consello de Estado e logo de deliberación do Consello de Ministros na súa reunión do día 14 de marzo de 2008,

DISPÓN O:

Artigo único. *Modificación do Regulamento xeral de ingreso e promoción nas Forzas Armadas aprobado mediante Real decreto 1735/2000, do 20 de outubro.*

O Regulamento xeral de ingreso e promoción nas Forzas Armadas aprobado mediante Real decreto 1735/2000, do 20 de outubro, modifícase nos seguintes termos:

Un. A alínea a) do punto 2 do artigo 3 queda redactada do seguinte modo:

«a) Para cursar o ensino militar de formación para a incorporación ás escalas de suboficiais, aos militares profesionais de tropa e mariñeiría reserváselles por promoción interna polo menos o 80 por 100 das prazas convocadas e, tendo en conta as características, facultades e exixencias de cada escala, poderáselles reservar, nalgúns casos, a totalidade das prazas convocadas.»

Dous. A alínea h) do punto 1 do artigo 15 queda redactada do seguinte modo:

«h) Estar en posesión dos niveis de estudos ou da titulación exixida para acceder a cada centro de ensino militar ou en condicións de obtela na forma e prazo que se establezan na convocatoria.»

Tres. Engádesse detrás da alínea c) do punto 1 do artigo 16, unha nova alínea d), co seguinte contido:

«d) Para acceder ás escalas de suboficiais dos corpos xerais dos exércitos, Corpo de Infantaría de Mariña e corpos de especialistas dos exércitos, na cota de prazas que o Goberno reserve para esta modalidade de ingreso, exixirase calquera dos requisitos que para o acceso aos ciclos formativos de grao superior se determinan no artigo 21 do Real decreto 1538/2006, do 15 de decembro, polo que se establece a ordenación xeral da formación profesional do sistema educativo, e que a continuación se detallan:

1.º Estar en posesión do título de bacharel ou dunha titulación equivalente das recollidas na letra b) da disposición adicional sétima do Real decreto 1538/2006, do 15 de decembro.

2.º Ter superado a proba de acceso aos ciclos formativos da formación profesional de grao superior a que fai referencia o artigo 41.2 da Lei orgánica 2/2006, do 3 de maio, da educación.

3.º Ter superado a proba de acceso á universidade para maiores de 25 anos a que fai referencia o artigo 69.6 da Lei orgánica 2/2006, do 3 de maio, de educación.»

Catro. A alínea a) do punto 2 do artigo 16 queda redactada do seguinte modo:

«a) Corpos xerais dos exércitos, Corpo de Infantaría de Mariña e corpos de intendencia dos exércitos, cando se exixan os requisitos académicos dos puntos 1.a) ou 1.d) deste artigo: vinte e tres anos, excepto para militares profesionais e membros do corpo da Garda Civil, que se establece en vinte e sete anos.»

Cinco. A epígrafe 1.ª da alínea b) do punto 2 do artigo 16 queda redactada do seguinte modo:

«1.º Escalas de oficiais, cando se exixan os requisitos académicos do punto 1.a) deste artigo e, escalas de suboficiais cando se exixan os requisitos académicos do punto 1.d) deste artigo: vinte e tres anos, excepto para militares profesionais e membros do corpo da Garda Civil, que se establece en vinte e sete anos.»

Seis. O punto 1 do artigo 22 queda redactado do seguinte modo:

«1. Requisitos académicos: estar en posesión de calquera dos requisitos que para o acceso aos ciclos formativos de grao superior se determinan no artigo 21 do Real decreto 1538/2006, do 15 de decembro, polo que se establece a ordenación xeral da formación profesional do sistema educativo, e que a continuación se detallan:

a) Estar en posesión do título de bacharel ou dunha titulación equivalente das recollidas na letra b) da disposición adicional sétima do Real decreto 1538/2006, do 15 de decembro.

b) Ter superado a proba de acceso aos ciclos formativos da formación profesional de grao superior a que fai referencia o artigo 41.2 da Lei orgánica 2/2006, do 3 de maio, de educación.

c) Ter superado a proba de acceso á universidade para maiores de 25 anos a que fai referencia o artigo 69.6 da Lei orgánica 2/2006, do 3 de maio.»

Disposición adicional primeira. *Formación complementaria en caso de acceso directo a escalas de suboficiais.*

Os alumnos que ingresen por acceso directo nos centros docentes militares de formación cursarán os plans de estudos en vigor para a incorporación, en función da súa especialidade fundamental, ás respectivas escalas de suboficiais. Non obstante o anterior, atendendo á singularidade de cada exército, poderáselles impartir un complemento formativo adicional, cuxo contido, carga lectiva e duración serán determinados polo ministro de Defensa e que, en ningún caso, será superior a cinco semanas.

Disposición adicional segunda. *Acceso de estranxeiros a militar de complemento no Corpo Militar de Sanidade.*

Nos termos previstos na disposición adicional sexta da Lei 39/2007, do 19 de novembro, da carreira militar, poderán acceder á condición de militar de complemento no Corpo Militar de Sanidade na especialidade de medicina, os nacionais dos países fixados no anexo I do Regulamento de acceso de estranxeiros á condición de militar profesional de tropa e mariñeiría, aprobado polo Real decreto 1244/2002, do 29 de novembro, e nas condicións recollidas para os militares de tropa e mariñeiría no artigo 2 do citado regulamento.

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 14 de marzo de 2008.

JUAN CARLOS R.

O ministro de Defensa,
JOSÉ ANTONIO ALONSO SUÁREZ

MINISTERIO DE AGRICULTURA, PESCA E ALIMENTACIÓN

6150 *ORDE APA/940/2008, do 2 de abril, pola que se establecen os baremos de indemnización polo sacrificio obrigatorio dos animais obxecto dos programas nacionais de control de salmonela en bandos de aves preprodutoras e poñedoras do xénero «Gallus gallus». («BOE» 84, do 7-4-2008.)*

O artigo 17.1 da Lei 8/2003, do 24 de abril, de sanidade animal, dispón que, en caso de sospeita dunha enfermidade de carácter epizoótico, que pola súa especial virulencia, extrema gravidade ou rápida difusión implique un perigo potencial de contaxio para a poboación animal,

incluída a doméstica ou silvestre, ou un risco para a saúde pública ou para o ambiente, ou de calquera proceso patolóxico que, mesmo non reunindo as características mencionadas, ocasione a sospeita de ser unha enfermidade das incluídas nas listas de enfermidades de declaración obrigatoria, a autoridade competente poderá adoptar, como medida cautelar, o sacrificio obrigatorio dos animais enfermos e sospeitosos, prevendo no seu artigo 18 que, tras a confirmación definitiva da existencia da enfermidade, a comunidade autónoma actuará do modo establecido en cada caso. Así mesmo, no seu artigo 21, dispón que o sacrificio obrigatorio dos animais dará lugar á correspondente indemnización pola autoridade competente, en función dos baremos aprobados, e que, para ter dereito á indemnización, o propietario dos animais deberá ter cumprido a normativa de sanidade animal aplicable en cada caso.

A Unión Europea elaborou unha normativa específica en materia de control de salmonela, constituída polo Regulamento (CE) n.º 2160/2003 do Parlamento Europeo e do Consello, do 17 de novembro, sobre o control da salmonela e outros axentes zoonóticos específicos transmitidos polos alimentos.

O artigo 5 do citado Regulamento (CE) n.º 2160/2003, dispón que os Estados membros establecerán programas nacionais de control para cada unha das zoonoses e dos axentes zoonóticos enumerados no anexo I para alcanzar os obxectivos comunitarios de redución da prevalencia das zoonoses e dos axentes zoonóticos indicados no seu artigo 4.

Dentro deste marco, mediante a Decisión 2006/759/CE da Comisión, do 8 de novembro de 2006, pola que se aproban determinados programas nacionais para o control da salmonela en bandos reprodutores da especie «Gallus gallus», aprobouse o programa presentado por España, de aplicación desde o 1 de xaneiro de 2007. Dentro deste programa, unha das medidas previstas é o sacrificio obrigatorio das aves de bandos consideradas infectadas, polo que se fixaron os correspondentes baremos mediante a Orde APA/1604/2007, do 1 de xuño, pola que se establecen os baremos de indemnización polo sacrificio obrigatorio dos animais obxecto do programa nacional de control dos cinco serotipos de salmonela máis frecuentes na salmonelose humana, en bandos de aves reprodutoras do xénero «Gallus gallus». Esta orde debe ser modificada para adaptar os valores aos prezos do mercado.

Por outra parte, no que se refire ás poñedoras, mediante a Decisión 2007/848/CE, da Comisión, do 11 de decembro de 2007, pola que se aproban determinados programas nacionais para o control da salmonela en bandos de galiñas poñedoras da especie «Gallus gallus», aprobouse o Programa nacional para o control da salmonela en bandos de poñedoras da especie «Gallus gallus», presentado por España, de aplicación desde o 1 de xaneiro de 2008. Dentro dese programa, igualmente, unha das medidas previstas é o sacrificio obrigatorio das aves de bandos consideradas infectadas, polo que procede fixar os baremos de indemnización correspondentes.

Razóns de seguranza xurídica fan que sexa aconsellable unificar nunha soa norma os baremos aplicables tanto a reprodutoras como a poñedoras, procedendo a derrogar a Orde APA/1604/2007, do 1 de xuño.

Na elaboración da presente disposición foron consultadas as comunidades autónomas e as entidades representativas dos intereses dos sectores implicados.

Na súa virtude, dispoño:

Artigo 1. *Obxecto.*

Esta orde ten como obxecto establecer os baremos de indemnización polo sacrificio obrigatorio dos animais obxecto dos programas nacionais de control da salmo-